




## Schnitzelbank 2019

*D'Muntlager Beiza dia muesch kenna,  
Wenn di an stolza Eidgenoss wetsch nenna.  
So Lüüt müesstma doch Nohilf geeh,  
Da Hueber sötts doch gad mit in Uusgang neh.*




*Ida Krona, so send d'Parkplätz rar,  
Drum häts o hüt koa Gäscht, isch doch klar.  
Neu hommer jo da Salvatore do,  
Mör hoffid, ör send mit am Velo do.*



*Z'Muntlaga isch da Fuassballwahnsinn los,  
geg de FC Basel spillt ma gross.  
Währe'dem Spiil wird gsoffa und über da Flitzer glacht,  
Zum Glück hät kona dä Doppeladler gmacht.*




*Im Oberriet do ischma verdutzt,  
Dia neu Tornhalla wird nöd zum Torna gnutzt.  
Ob Gwerbeverein, KTV oder sus en Lalli,  
uufzmol töрма döt fäshta, zahlt hond jo alli.*





*Gmoand Oberriet loht sich gär nöd lumpa,  
Mör hond etzt on Stäg zum in Weiher inigumpa.  
Wänns wiederamol son hoassa Summer git,  
dänn isch jo s'Wichastoah nöd allzu wiit.*



*Da neu Doktor im Dorf er isch nöd wüchlich beannt,  
doch gliich ghört ma vo em scho allerhand.  
Bis etzt kunnt em sini Praxis nöd wirklich z'loofa,  
drum probierters gad ono mit Auto verkoofa.*



*Da Wolf und da Stoabock, es send zwo Böck,  
ab und zua luegids enand oh gern under d'Röck.  
Aakoh sends z'Oberriet am Ziel verbii,  
s'Schwuulawäldli wär doch z'Kriessera gsi.*



*Häsch du z'Oberriet amol Hunger oder Doarscht,  
sit 35 Jahr koa Problem, denn äss a Zündwoascht.  
Verdient ischer id Pension, es git üs da Räscht,  
dafür soachid Goascha ab däna Wörscht numma is Näscht!*



*Häsch du z'Oberriet amol Hunger oder Doarscht,  
sit 35 Jahr koa Problem, denn äss a Zündwoascht.  
Etzt ischer pensioniert, mör mond da Fleischkonsum begränza,  
är hälft üüs im Kampf geg üseri Ränza!*



*D'ARA z'Oberriet git sich de goldig Schliff,  
mit Gebühra hond si d'Finanza im Griff.  
S'Bauamt Oberriet verzichtet gern uf dia Schtür,  
o sii gond mit Grüana uuf Alstätta zum Thür.*

